

第六九四冊

經濟彙編

食貨典

雜稅部

平準部

(卷)

三五—三三

三三—三三

古今圖書集成

中華書局影印

古今圖書集成

中華書局影印



欽定古今圖書集成經濟彙編食貨典
第二百二十五卷目錄

雜稅部彙考九

明四 萬曆五期

皇清一 總一則 順治十三則 康熙十二則

食貨典第二百二十五卷

雜稅部彙考九

明四

萬曆二十七年復設各省市舶稅課及開礦稅

按續文獻通考二十七年二月留守後衛千戶張宗仁奏敬陳末議請復舊課等事奏徵杭嘉寧紹湖貨稅奉旨這所奏浙江舊有市舶稅課現今尚復徵收就著奏內崇文門奉御劉成督率原奏官民前去會同彼處撫按等官照例徵收解進以濟國用不許擾害地方為勅與他二月天津徵稅太監馬堂奏亟議加增界內鋪店牙課等事奏每年再加銀二十萬兩奉旨是天津臨清徵稅銀兩每年如數解進不許疎漏隱匿錦衣衛百戶柳勝秋奏懇恩查開原奏併乞聖旨以便遵守事奉旨這所奏密雲縣地方貨物稅課都照勅諭開載徵收不許重疊困累商民還著內官王忠張煜會同該撫按官議定具奏該部院知道管理通灣太監張煜奏年例事竣恭進租銀三千三百一十餘兩奉旨銀兩著進收通灣租課地方著會

同天津馬堂分定經界以蘓商困今後不許越境互相重復徵收戶部知道四月儀真太監暨祿祿商民抗旨阻撓參守禦楊應光坐視不救又巡視南京西城馬嗣元題有百戶前來本京上新河本鋪地方豎立旗杆收欄江稅鈔出示每貨一兩納稅三分并搭包皮箱一應物件俱要盤驗明白方准放行比有沿江灣泊船隻約千餘人不暇將百戶隨從人毆打又大學士沈一貫揭為京口儀真差官抽稅乞賜停免奉旨朕覽卿奏情詞迫切具見忠愛至意連年以來西征東討兼發賑濟以致帑藏匱乏目今兩宮雖已就緒三殿將次興工且有應行典禮若非設處財用安忍加派小民所奏兩處地方不遠京口聞已免差遣儀真縣處始前旨行錦衣衛百戶陳道元奏蘇松常鎮四府抽取商稅每年可進五六萬兩千戶游俠奏姦險府官吳寶秀等朋謀抗旨上欲重擬大學士沈一貫揭請得准送法司擬罪具奏天津徵稅太監馬堂參守備王煬奉旨王煬蓄謀調度大肆猖狂已有旨了首惡王朝佐等著該撫按等官遵旨上緊嚴拿具奏不許徇私延緩馬堂著策勵供職還要禁止額外需索不許濫用匪人又諭奉御陳奉曰湖廣江西地方隔省不同濫差曠遠征收殊失朝廷裕國通商之意各處稅課著照撫按所管行若有聽信撥置妄行奏擾一併治罪不饒五月錦衣衛千戶韋夢麒奏湖廣荊州地方原有辛亥忠店房曾經遞藩竊據抽稅復有張居正私意革免前稅今被土豪好棍侵費上命原奏官民前去彼處守備內官會同撫按作速查明具奏不許徇私隱蔽浙江巡撫劉元霖奏愚

民聚譁懇乞於有并勅權使嚴禁約杜姦萌以安東南重地奉旨朝廷差官稅課原為裕國通商徵收經紀之羨餘何乃各該有司官不能仰體奉行以致人心驚擾這奏內倡亂首惡便著嚴行拿究題請正法其餘脇從悉皆赦宥還明白曉諭撫按地方今後務體朝廷德意公同調停如勅奉行不得仍前坐視成敗一體治罪不饒鷹揚衛正千戶王宮杜奏河南彰德府鄧州等處土產貨物及各馬稅課有裨國用上命開礦太監魯坤管徵不妨礦務督率原奏官民前去彼處會同撫按等官照例徵稅及馬匹解進不許擾害地方遼東徵稅太監高淮奏姦商結黨阻撓奉旨這所奏開原廣寧山海關羅城地方客商聚眾鼓噪千總陳事忠及指揮齊汝功等不行救護好生可惡陳事忠等并行兇首惡趙良輔等都著撫按官嚴行提拿分別奏請正法不許怠玩徇私容縱其餘脇從俱赦宥又奏山海關內舊有鎮守府一所見今空閒改為福德店進置店銀五百兩山東徵稅千戶喬嵩奏德州清寧徐州南界等處稅課每年可加銀四萬兩與原額共銀十萬有裨國事上命內官陳增遵照敕諭會同撫按等官照例徵收銀兩一併解進馬堂著遵敕旨督管徵收臨清天津等處錢糧朝廷開礦徵稅原為裕國通商愛民德意何乃原奏官民不知仰體又不由欽差內官督率奏請輒懷私弊往往辯爭朦朧瀆擾殊失體統今後各處敢有違法的著彼處內官嚴拿參究治罪太監李鳳奏廣東廣州府及太平橋海嶺等處稅課上命會同撫按官遵照敕旨照例徵收銀兩解進以濟國用爾須潔己奉公不

恭獻己山瑞礦等事奉旨這所奏獻礦山忠義可嘉准差內承運庫僉書右少監王相督率原奏官民前去彼處會同撫按照例開採銀兩解進不許擾害地方寫勅與他府軍右衛前所正千戶陳保奏自去歲見聖旨差內臣李敬前去廣東雷廉瓊三府所屬合浦等處採取然其間未盡事宜不敢隱默看得廣東一省十府之地產珍奇之物則有珍珠瑪瑙珊瑚琥珀玳瑁雄黃象牙倭段翠毛冰片硃砂等物雜貨之類則有沈香降速苜草蘿木胡椒白糖龍枝及諸品藥材等物古稱豐稔之鄉萬物叢集之處若令各商各行牙稅銀兩每年不下三萬餘金皆被本士勢豪霸侵肥己此臣之汲汲於心者一也臣查得世宗初年廣東原設有總鎮兩廣地方御馬監太監潘忠市舶司太監熊宣看珠池廉州府楊梅青鸞平江三池太監牛榮臣見近奉欽依內臣李敬雖在彼處率衆採珠三府所屬動經千里之外使李敬一人兩目不能遍觀隻身不能兼歷第恐羣下作弊以致精細者不能以進供上用此臣之汲汲於心者二也臣訪得在內忠正之臣惟內官監太監李鳳歷事三朝忠誠廉樸年逾五十動止周詳伏望我皇上俯察臣言遵照祖制舊例勅命內官監太監李鳳充任總鎮兩廣兼管廣東等處抽稅併珠池等地方訪察軍民利病得失不時密封奏聞如有土產及方物珍重器寶不時差人進獻及將先年彼處原設市舶司內臣衙門伏乞欽賜店名不妨總鎮事務協同臣等前去徵收稅租銀四萬兩每年兩季解進御前交收庶民無侵擾之私則大工得以克濟矣上卽俞允燕山右衛千

戶胡忠奏請復舊稅急救時艱以濟大工以裕邊儲奉旨這所奏福建八府一州舊有市舶稅務以濟國用准差御馬監左監丞高宗督率原奏官民前去彼處會同撫按等官照例徵稅解進不許擾害地方為勅與他忠義右衛千戶張國臣奏因時效忠恭獻奇寶照例採取以裕國用奉旨這所奏雲南地方所產金銀礦洞極廣且有寶井奇品等物有裨國用准差尚膳監太監楊榮督率原奏官民前去彼處會同撫按等官照例開採解進不許擾害地方為勅與他燕山前衛指揮馮剛奏謹獻奇異銀礦以助大工以補國用奉旨這所奏福建地方見有先年礦洞設兵防守開採便益就著市舶徵稅內官高宗帶管礦洞督率原奏官民前去彼處會同撫按等官照例開採解進雲南道御史葉永盛奏言通者礦店煩興惟議繼起中使復戾棍黨橫行西北江浙之間不勝其擾惟是畱都根本之區稍稍安枕臣竊以為一方私慶不意無賴武弁鄭一麒馬承恩輩復有京口儀真獻店設權之請嗣京口無遣而儀真等處之稅如故已經科臣連疏抗論未蒙俞允臣方欲具疏復論忽接邸報見供用庫左副使暨祿條議復舊稅內開沿江各府州縣內外河道有裝販私鹽貨料等項並容其統屬覺察夫自古設權止於江湖要津並未連及各府州縣亦止商賈裝載並無土商土著名色原奏官馬承恩借一儀真而牽連沿江上下借一商稅而巧立土商土著名色其設法造謀蔓延四及已罪不容誅乃暨祿又從而推廣之承恩曰沿江上下而祿又益之曰各府州縣承恩曰要津通衢而祿又益之曰內

外河道夫江南諸府州縣雖深山窮谷何處無河何處無水道雖窮鄉僻壤亦何處無土著何處無交易今不論內外盡歸統屬則舉留都之府縣舉各府縣之河埠細及米鹽雞豕粗及柴炭蔬果之類一買一賣無物不稅無處不稅無人不稅將縣無寧村村無寧家內外騷動貧富並擾流毒播虐寧有紀極此開闢以來所未有之暴也暨祿又曰各不正則事不當欲將韓文盛等給與官帶委官各名色庶免勢豪復捏假官之玷頃者畿輔之間假官私委已不勝擾然曰假官人猶得持其短長彼猶隱然惴惴惟恐一朝敗露譬之魍魎魍魎晝伏夜出肆害尚小今既欽給冠帶彼將顯然以命官自居恣睢縱肆何所不至即使噬人白晝掠貨通衢如狼如虎如盜如虜誰阻之者且中官藉此輩為爪牙此輩又藉各土棍為羽翼凡十室之村三家之市有土著即有土棍有土棍則有藉土商名色以吞噬鄉曲者是梟獍連袂而戎莽接踵也民尚得安枕而臥哉聖旨謂不忍加派小民臣謂加派雖云害民然派有定額徵有定制不如制者上司猶得以三尺議其後此則橫心所逞更無限制橫口所噬更無忌憚告之府縣府縣不敢理告之撫按撫按不能問告之陛下陛下又以以為阻撓而反罪之民怨結胥吏泣徧野如是而人心不離天下不亂者自古及今未之嘗聞此其事非加派而害更甚於加派皇上不忍之彼而獨忍之此是知挺之殺人而不知刃之殺人也皇上之意以為徵商稅乃所以蘇小民不知奏內土著土商正所謂小民小民與商其實無兩諱言於民徧言於土商此羣小之巧計奈

之何其不察臣聞天子以四海為家所不足者非財此數者斂之百姓不啻股骨髓聚之內府不足當毫毛為毫毛無益之積致百姓流離困苦之憂非聖明所宜忍而況上取一下取二官取一羣姦又取二利則歸下怨則歸上名則朝廷蒙其垢實則羣小享其益陛下何苦身斂怨而予姦黨以劫奪之藉為也伏念皇上燭羣小之奸謀軫無窮之憂禍輕目前之小利思將來之隱憂收回成命亟停暨祿之遣仍將首事鄭一麒馬承恩韓文盛林廷柱等付之法曹斬首藁街以為將來欺君瀆奏之戒萬曆二十八年搜括各處稅課推算無遺吏部等衙門以天變山崩上疏極諫按續文獻通考二十八年正月錦衣衛百戶夏榮奏魚課久虧餘鹽可惜奉旨這奏直隸寶坻縣地方先年設立魚廠原係內官管理歲進銀兩以供祭祀享用著開礦內官王虎兼管督理其彼處鹽場念係畿輔地方豈可擾害困累羽林前衛千戶王承德奏遺稅奉旨這奏南直內遺廬州四府州縣稅銀每年可得銀四萬兩准著儀真督稅內官暨祿帶管督率原奏官王承德為首土民謝溥前去會同撫按等官徵收銀兩一併解進何用多人參議以滋煩擾杭州土民童學羅天德等奏稱先年行查天下僧道廢絕山田地產可變價助工見有浙江杭州府洞霄宮存產萬金俱被勢豪盡占舉一可知有旨令撫按官查奏錦衣衛百戶王體仁乞併船稅奉旨湖廣如奏浙江諸處俱以重復報罷南京守備邢隆奏管洲田上可其奏山西撫臣魏允貞奏增稅額奉旨這本說山西

五府地方原奏稅額銀五萬兩大同屬於張煜已徵稅銀四千八百兩今奏請行令太原等四府於四萬之外再加稅五千二百兩屬於孫朝共足原奏五府五萬額數既會議奏來特准如數徵收銀兩解進以濟國用以昭朝廷愛惜邊疆商民德意陳增奏南直隸雲臺山三官廟每歲香稅一千餘兩願比泰山事例委官查收以助國用上即命陳增收解賜廟額為護國三官廟浙江稅務監丞劉成奏清查各省歲額餘銀及餘課無礙銀兩上以南北二直隸係畿輔地方各有所司不必會查已有旨了奏內蘇松常鎮原係南直隸所屬著孫隆免行會查其浙省便行欽差內官劉忠遵照前旨上緊會查具奏丘乘雲進四川稅課銀七千七百餘兩奉旨昨把總韓應龍所奏四川成都等府出產茶鹽稅課并重慶馬湖等府沿山千里盡產名木其大者進上小者變價歲利約可十萬餘兩如何朦朧重覆具奏顯是欲得委用圖利肥己擾害地方其茶鹽稅課照前旨徵收解進該省所產名木就著內官丘乘雲會同撫按等官查勘具奏照例採取以濟大工奏內清查本省積餘無礙銀兩遵旨上緊會查解進應用韓應龍姑不究孫隆奏王鎮等懷姦撥置越界橫徵上日有旨直隸沿江一帶往來船隻遺稅准著儀真督稅內官暨祿會同徵收不許侵越鈔關并各處疆界重徵疊收今如何聽信原奏官百戶王鎮土民錢文明等撥置又於無錫孟河口等處統率羣姦隨從數百餘衆徧插黃旗指稱欽差員役攔截商船一槩重徵以致商船違道虧損稅課好生違背欺玩暨祿姑免究著策勵供職

王鎮及錢文明還著暨祿會撫按官嚴提問擬不許連累無辜以安地方吏部諸衙門尚書等官李戴等奏九月中太白太陰同見於上又聞狄道山崩成坑更於平地湧出山大小五座太白太陰同時書見相犯已為極異乃至山陷成谷地湧成山則自開關以來惟垂拱中有之而今再見矣夫天命主於民心民安則天示禎祥民不安則天垂譴告欲承天意當順人情近來天下賦稅之額比二十年已前十增其四天下殷實之戶比二十年已前十減其五東征西討蕭然苦兵自礦使出而百姓之苦更甚於兵自稅使出而百姓之苦更甚於礦加以水旱蝗災流離載道畿輔近地夥盜公行至殺職官家屬二十餘人而地方官不敢以盜聞臣等以為此非細故也皇上憫念小民不忍加派德意甚盛臣等豈不仰體但奉差諸使各圖其私跟隨姦徒動以千百皇上欲通商而彼專欲害民皇上戒以勿信撥置而撥置愈多皇上責以不許騷擾而騷擾愈甚皇上之心但欲裕國不欲病民羣小之心必自瘠民方能肥己蓋近日有神姦二種其一專務窺探上意具有成奏假武弁之手以上之其一專務剝害小民畫有成謀假中官之手以行之運謀如鬼蜮取財盡錙銖遠近同嗟貧富交困貧者家無宿儲止憑營運但奪其數錢之利已扼其一日之喉至於富民更被傾害誣以漏報國稅誣以盜賣礦砂誣以私販官鹽誣以偷藏禁木妝成局面聲勢赫然及其得財寂然無事需求不遂立見傾家無地可容有天難訴利歸羣小怨歸朝廷假令民間不窮而怨民力猶堪而怨或為民心猶固今以刺骨

之窮抱傷心之怨一呼易動一動難安今日猶是承平民心洶洶不定一有風塵之儼誰為可保者夫呶賊誅闢白死此皆用人丁以為兵用民財以為餉若一處小民倡亂各處小民應之何取兵乎何取餉乎皇上神聖洞知今古自秦漢以來天下危亂之由惟有四字曰人人嗟怨而已臣不敢言其遠皇上試差親信忠實之人訪問都城內外里巷歌謠令一一具實陳奏則民之怨否居然可觀天心仁愛明示咎徵欲皇上翻然改悟坐弭禍亂乃禮部各省之章未蒙批發而奸民搜括之奏又見先行即如何其賢遍解天下無礙官銀一節各處錢糧皆有定額所謂無礙云者不過支剩羨餘近日徵調太頻徵求太急正項錢糧尚多拖欠羨餘支剩何處得之此令一下急如星火不但指有礙為無礙亦將指無銀為有銀必將正項公銀半充進獻公用無措又派民間庫藏既空閭閻亦敝有司一有爭執輒為阻撓身且不保何有於官官且不安何有於民又如仇世亨奏徐鼎掘墳一節事之有無誠難懸斷然以理論之豈有一墓而有黃金巨萬之理即使有之亦當先下撫按勘核虛實分別首從先正其掘墓之罪而後以墓中之物入官未有罪狀未明而先沒入賞財者也片紙朝入嚴旨夕傳即有深冤誰敢辯理不但彼此諸族又將攀害多人但有株連立見夷滅載輦之下尚須三覆萬里之外止據單詞遂令役指至賤之流操此生殺極重之柄此風一倡誰不效尤臣等方欲陳奏而高時夏戴君恩之奏又得旨五日之內搜取天下公私銀兩已二百萬傾府庫之藏豈無盡日窮天地之產寧

有已時奸內生奸例外創例臣等前日猶望其日減今日乃更患其日增不至民窮財盡釀成大亂必不肯止伏望皇上穆然深思超然遠覽上天可畏下民可憫亟與廷臣共圖修省杜中臣攘奪之路絕羣小窺伺之萌無令四海蒼生之衆結怨清朝無令千秋青史之編貽累聖德臣等有心恤緯無力回天所望者九廟之神靈所恃者九重之英斷耳不勝懇切仰祈之至

萬曆二十九年御史陳燧巡按方大美疏諫礦稅

按續文獻通考二十九年四月南京四川等道御史陳燧疏近聞邸報觀覈旨處分楚事道府諸臣降者降逮者逮一切爲陳奉所橫詆而羅織者無不落陷弄羅毒鋒矣迄今忽聞楚中稅監三月初六日殺死縣民李廷玉尹子芳郭維翰徐牛兒四人有被拿入稅府存亡未審者有王長兒謝鳳二名俱被傷重垂死者嗟嗟清平世界有此景象傳流都下人心洶洶尚容緘默不爲陛下一陳之乎夫陛下初念大工煩費帑藏空虛特差權稅諸務聊佐一時國用之急顧諸璫肆出未免與小民較錙銖之利已非人情之所樂輸所以慰諭安輯之者獨有慘慘不許擾民之旨在也自陳奉銜命入楚苞苴納級流棍掘人墳毀人房淫人婦女掠人財物刈人若草營操聚斂培尅之術而侵撫按糾劾之權日弄機鋒節肆簧鼓恨州縣則害州縣憎府佐則害府佐惡青衿則禍青衿今日諸守道明日傾監司暴戾恣睢日甚一日彼其心蓋視生殺予奪若掌中物而逮繫斥逐之令且朝奏而夕下陛下果以奉之採權爲無驕擾之甚而姑縱之

以重其事權乎傳云有人斯有土有土斯有財今者人與奉爲仇家與奉爲敵不可謂有人矣羣情鼎沸大勢土崩殆哉岌岌而尤冀其能爲陛下斂財臣等所未解也夫楚人深於怨從古記之標勇輕悍又其俗然也獨奈何令惡璫如奉者以楚人戕楚人而激變之故一鼓噪於荊州再鼓噪於承天今又疊見於江夏矣猶幸不大致決裂者以二三憂國奉公之臣素爲調護也頃見逮繫相仍摧殘已極靡不垂首喪氣人人解體即忠良莫知措手爲社稷計將來誰復爲陛下腹心者孟氏不云乎君之視臣如手足則臣視君如腹心如陛下責臣工以腹心之報謂手足相視不當如今日大馬之士芥之也一旦緩急孰與排難陛下即不爲諸臣計獨不自爲社稷計乎臣聞奉之處楚僭稱楚王輒呼千歲每出入陳兵自衛結納亡命數千人仍欲請十二中使基布要地以惟所欲爲故先威惕道府州縣并鉗制撫按俾一切莫敢誰何識者已虞其有逆瑾之禍即不然虐焰已熾怨讟日盈三湘七澤之間攘臂一呼聲應四起無論奉之終爲楚禍究其勢必至於不可收拾武昌去建業盈一水順流而下信宿可至舊京重地能保安堵無恙乎又臣等所大懼也矧荆楚乃聖祖發祥之地何容惡璫釀爲禍本切念皇祖鑒察必然震怒揆之聖衷亦自有大不忍焉者陛下朗然洞察穆然深思亟將陳奉逮去法司明正其罪上以慰聖祖在天之靈下以洩全楚士民之憤其先後被逮拘囚各官悉從矜宥仍勅楚中撫按而大小臣工爲國爲民不隨不激各畢其應盡之職分而輯其未定之人心庶幾

一方安而天下安宗社靈長之慶端有攸賴五月都察院左都御史溫純疏臣等目觀今天下第一殃民起叛貽君父不美之名者無如礦稅諸使今天下第一安民弭叛昭君父至美之名者無如罷礦稅諸使蓋諸使之害一而參隨之害百參隨之害百而參隨所引用土棍之害不啻千萬參隨以諸使爲城社土棍又以參隨爲城社城社遍天下而狐鼠亦徧天下狐鼠徧天下而天下可保無事乎當楚變未成之先人已慮有今日而不敢盡言使閭閻冤苦決裂以至此極致撫臣身不能自保中使所仇者撫臣楚民所怨者亦撫臣皇上所歸咎者亦撫臣然則撫臣將安策耶向使陳奉早聽撫臣與馮應京等言預爲收斂禍豈至此而不幸使撫臣馮應京等言驗而無益也雖然猶可爲也方今各省礦稅縱使殃民不獨一陳奉天下欲甘心礦稅之使者不獨一楚人楚未旱荒猶不堪此欲割刃於陳奉今自黃河以北東極遼左西盡宣大方數千里麥苗已枯秋禾無望民之食樹皮者已無皮可食賣子女者已無人能買甚至有人相食之慘尚可謂楚雖變無傷天下雖有類楚者無能爲民雖饑饉不足卹耶故臣等切願皇上遣官校速逮陳奉免爲亂民蓋粉以全國體庶明威出自皇上而太阿不致倒持且今何時也經年不雨聖心已徹惕矣徹惕之言恐但激於一旦徹惕之實恐旋涉於空文故臣等切願皇上應天以實撫衆以仁盡撤各省礦稅諸使兼釋馮應京蔡如川吳應鴻華珏何棟如甘學書王正志杜承芳等與海內更始普天率土又誰不頌我聖天子英斷向者明旨所謂權宜之

計今果旋行而旋輟之也又誰不服我聖天子之大信蓋一舉而中興之業成一日而太平之治就不然人人切齒於諸使則人人思亂在在不堪其因擾則在在效尤誠恐盡如楚而日且加甚以其加於提校者加於諸使縱惡長姦辱國損威且滋甚而乘時鼓衆斬木揭竿之風有不忍言而不易戡定母謂臣等今日坐視不言也然其機惟在乎皇上一轉移之而已皇上慨然下盈尺之詔俯俞臣等所請則既渙之人心復萃將離之天意可回從前之亂孽即消萬禩之鴻圖永固矣又江西巡按方大美一本鎮民鼓噪有因捕官救援無及據實直陳懇乞聖鑒以周遠慮以安重地事江西礦地旋封於此旋開於彼人心不無惘疑臣不得已再四調停即有一二山場久採無益臣伏覆行各道禁諭居民幸不至於大誹臣一念愚忠以爲上可供內府之用下可全西江之命願與中使潘相失心奉公而無樂乎其生擾也不意七月二十五日監舍王四豎立旗杆於景德鎮藻麗炫觀誼傳爭看乃王四先令巡檢方河柳一人後令百戶劉光宸責一人隨欲攫擄平民再枷再責致激衆怒而碎杆毀屋臣於本月二十五日巡歷瑞州得知卽星馳至省與撫臣會牌行查業已具疏上聞矣忽於十二月十七日接得邸報該江西礦稅燒造少監潘相題爲屬官親法欺君率衆燒毀皇廠并毀御器懇乞聖明大奮乾斷以壯國威以正法紀事奉旨這奏內土豪楊信三構黨萬餘燒毀新建廠房并毀瓷器等項代署縣印通判陳奇可既係委官不行救捕好生欺玩陳奇可及楊信三都著錦衣衛便差的當

官校拿解來京究問其被毀廠房准動支布政司錢糧委官量行修葺臣一見之不勝駭異夫王四假中使之威方河劉光宸又假王四之威一舍兩官鴟張虎踞叱咤若狂當五月欽恤之時恩例免枷之日百姓何能堪此羣千百人起而鬪之思以逞於一擊因其脫逃無可甘心遂燒毀其屋而燎及廠房門廊此誰召之而誰集之哉緣其聞所聞而來觀者本爲逐聲見所見而狂肆者遂至吠影倉皇擾攘之中無所施其舉手投足之力即王四劉光宸且至黑夜奔竄巡檢方河惟有踰牆避匿耳通判陳奇可職司府捕兼管密廠使其袖手不救已爲喪心倘至主謀放火罪何可有然而奇可未始不纓冠以救也救且至於被嫂罵中飛石而幾被重傷也祇以迂執之性自負氣高出入之間動至跡忤中使以爲屬官而以文法繩之奇可以爲府官而以禮貌抗之先是沈榜搖尾入幕比日奇可強項分庭臣知中使久不能堪不虞今日遂藉此以中傷矣若謂變起於奇可謀倡於奇可該鎮耳目昭昭具在卽中使此心且有不能昧者臣按一方屬官果有不法而臣爲之救解臣不敢也起釁原有別因而臣不爲之明言臣亦不敢也謹據實咨諏直陳顛末至其法之當加與夫情之可原皇上自有聖斷臣何敢必焉臣所慮者江西土瘠薄而風纖嗇民輕去其鄉動相鬪格十三郡惟饒爲甚饒惟景鎮爲甚商工輻輳亡命作姦有利則挾備以爭有害則奮臂以起擒之則鳥獸逃而不可窮治激之則蜂蟻聚而立致戈矛民情之可慮也如此瓷器燒造原無額派錢糧率由布政司設處并借工部事例

四司料銀湊支乃今價值日增每次估計數漸至於盈倍覓求既窮每次給發勢甚艱於躊躇欲執前以規後恐苦竄或藉以爲詞欲那彼以就此則空虛終無以爲應帑藏之可慮也如此江西省水陸至京必泛彭蠡涉長江澎湃千里出入波濤非浙省僅渡京口徑達閩河者比撞艘聯幫而進尚有漂流瓷船破浪而前寧無驚損待其驚損而責之補償既不能如糧船之攤賠賠補不前而責之重造又不免工本之再費船運之可慮也如此夫慄悍之民風既難就約束之內有限之錢糧不能當無已之求而造船之議一行督責之威更熾中使未必甘爲茶毒而擲置則在衆隨衆隨既已橫肆恣睢而播弄又在羣棍有司惴惴不敢問警潰離一決將來不可收拾恐未必如今日隨聚隨散而撲滅若是之易也臣環歷江西遍觀十三郡之風度南懸崖密箐峒賊據險阻以憑依蠡海巨浸狂瀾湖寇恃帆檣爲出沒兩地上下自昔患之然而兵戎星羅基列議察日謹月嚴控御自我令行禁止猶可杜意外之虞而絕潢池之警獨景鎮爲四方叢集之區益之以監舍生擾信州爲三省交界之地加之以採木妄傳今據廣信府申呈上末等縣流布妖言人心惶惑臣謂寧信其有母信其無已行各衙門加意防禦恐有不測之患視景鎮爲尤甚爲此兩地者實爲江西之隱憂發於今日則變速而小發於異日則變遲而大至於大變而其戡定之術更有難乎爲力者伏乞皇上申飭中使禁戢衆隨恪遵法令勿肆咆哮俾正供得爲轉輸閭閻可免騷動固江西之幸臣等之幸亦未必不爲中使之幸矣再乞

勅下工部查價酌量虛實船運計議安危探木查勘利害可省則省可罷則罷此今日弭變之急務而江西千年無疆之福七月湖廣守備兼管礦稅太監杜茂奏臣守備承天等處地方侍奉陵寢徵收莊湖子粒等項復於萬曆二十九年五月內勅臣不妨原務兼提督廣寧店租礦稅鑄錢等項但臣所理者陳奉已敗之緒而臣所憂者瘡痍未起之民若應處徵解事宜不早為奏請明白不免蹈前人之故轍何以裕國利民而稱委任之重哉自陳奉不能體德意額外苛求以致商賈罷市行旅罷途人人自危在在思亂即承天為皇祖妥靈之地法紀森嚴亦敢揭竿鼓譟而不畏臣之隱憂久矣今特遣兵部大臣前來撫綏地方初定舟楫稍通人心始獲更生之幸而撫字徵求勢難一時併舉此臣之所深慮者除一切應納銀兩臣與撫官會議明妥設法徵採每年兩次解進以助大工之用其武漢等一十三府二州原議包稅銀六萬兩臣尚未知徵輸難易何如不敢擅議但查荊州襄陽二府原不在額解之內俱係陳奉自行抽取以為買辦孝順貨物之用臣切思富有四海玉食萬方何者非其所有令臣下借買辦孝順之故自取兩府稅銀收養亡命之徒重徵疊取百計苛求且又填給勘合濫差匪人無分省直到處尋買而差人於中取利用一開十開百開勢所必有又於所到處狐假虎威陵虐商人打詐良善魚肉之苦不可勝言地方安能保其無事也况其買辦之費不係出自捐貲乃令內帑減應得之稅臣下增孝順之名羣小享侵漁之利地方受騷擾之害揆之事體孰得孰失此

輿情之所甚不服也臣若不改弦易轍革故鼎新是雖非陳奉其人而尤陳奉其事豈不負更易之聖心乎臣於武漢等府應徵額稅銀兩外仍將荆襄二府屬與撫按解銀除臣置辦鞘扛及一應公費外將所解銀兩加添類進不必差遣一人收買一物花費錢糧使怨歸於上利歸於衆務令衙門肅清投充屏絕則地方無打詐之害商民應惟正之供自然勸輸之恐後矣又有揭竿鼓譟之變哉乞念三楚凋殘之衆查徵臣亦抱無私乾剛獨斷俯准所請庶國課無虧下民益利而白叟黃童頌祝聖壽無疆其餘未盡事宜容臣會同撫按議處妥當再行奏請定奪施行萬曆三十年儀真稅務太監暨祿奏免遺稅勅停免礦稅及各處採辦旋改詔仍權行採用俟三殿落成請旨停止江西巡撫夏良心奏停浙閩江西採木刑科給事中楊應文奏治仗勢假冒權稅逼殺縣官等命之罪

按續文獻通考三十年二月儀真稅務太監暨祿奏稱原奏廬鳳淮揚四府遺稅及沿江一帶船料共課一十二萬皆出揣摩之數今地方早濤閭閻蕭條商民盡苦乞以見徵定額責成有司徵收類解奉旨遺稅准照一萬二千兩有司徵送暨祿收候船料照見進一萬一千五百兩同原奏委官徵收數進本年二月十六日有旨開礦抽稅為因三殿兩宮未完帑藏空虛權宜採用今著傳諭各處礦稅織造燒造俱著停止其南京供應機房係舊制并蘇杭織造內有御用及婚禮袍服俱著照舊已採徵在官金銀等件并織完絨疋燒完磁器還著原差內官押解進用如有

奸惡截阻及驛遞應付遲慢者指名參處鎮撫司及刑部千連前項人犯都著釋放官各還職建言諸臣都著復職行取科道俱著補用兵部尚書田樂戶部尚書陳渠俱著即出供職工部尚書楊一魁失塞黃河口衝我祖陵著革職為民次日司禮監太監田義又傳奉聖旨開礦抽稅為因三殿兩宮未建帑藏空虛權宜採用其各處礦稅織造燒造等項俱照舊行俟三殿落成爾等行戶部請旨停止恐爾等不知旨意到即與各撫按等知聞如有妄造謠言爾即時指名參奏重治不宥鎮撫司刑部人犯俱牢固監候

又二月江西巡撫夏良心奏本年正月准督理江西礦稅燒造右少監潘相手本開該錦衣衛百戶王心澤奏浙江衢州府接界江福永豐浦城官山內產大木乞要採伐已經委官勘銅塘封禁山界連浙江福建江西三省中無大木續該騰驤衛百戶趙應璧為奏產有大小相應開採該臣會同巡按御史方大美看得江浙閩三省之交官山二處一名雲霧一名銅塘先年因寇賊據險叛亂克平之後俱嚴封禁夫應璧所奏者雲霧今欲開者銅塘旨下所查者大木今所採者雜木數日之間差人絡繹民間騷動閭閻境驚惶府縣之申呈累牘士民之控告接踵咸謂銅塘一開禍機叵測與中使熟計而竟不入也在中使視彼為利數在臣等慮此為難端但本山崇岩邃谷外巉內夷素為盜賊巢穴蓋自唐宋以來即為封禁其故姑無暇論明典以來宣德正統間為叛寇項三鄧茂七葉宗留王龍鄭祥四蒼大頭等哨聚不獨殺官兵茶生靈不可數計而參政張英戰歿知縣鄧顯遇害

正統十四年特遣尚書金濂寧陽侯陳茂保定伯梁瑤平江伯陳豫相繼帥師征勦數年乃平轉餉征兵暴骸積骨難以縷述至嘉靖四十五年江西德興浙江開化礦賊作亂劫掠直隸徽寧等處突入婺源縣燒毀縣治大掠而還其勢益熾於是科道諸臣請設總督及兵備等官將前山嚴加禁封揭立豐碑以示永久又增立巡司多兵防禦此可按籍而考也迄今三省地方人民獲安詎非封禁之明驗哉今一旦開山伐木恐有四方如鄧葉輩觀釁乘隙竄聚揭竿江省自此無寧日矣職復考形家書南條幹龍之脈起自岷山其一支自南而來度庚嶺從節武抵信州千里來龍羣峯起復結局於建康鍾山風藏氣聚太祖高皇帝園陵在焉又聞形家言銅塘分水東流入浙西流入江中為建康鍾山交接之處極宜蔭護不得損傷夫士庶之家一丘一隴尚圖林木叢茂蔭護來龍皇上為聖子神孫建億萬年不拔之基詎可不為祖陵計聽彼開山伐木俾龍脈單寒致有損傷乎又三月刑科給事中楊應文奏臣辦事該科見陝西稅監梁永本再四看詳竊痛徐斗牛不得其死如此而猶未悉其詳也又謂杭大賢暴橫無忌如此而猶未知其為誰所使也及接陝西巡撫賈待問揭帖具言渭南知縣徐斗牛奉公體國稅銀完解陡被積棍大賢謀充稅委仗梁永之勢假權稅之名帶令參隨李良金張月杭白子等數十餘人抗違不許擾民明目冒稱欽差大張旗幟勢焰喧嘩闖入渭南縣堂餽以下程未厭也復索常例逼罵斗牛未已也復鎖打胥吏收頭等而王興國趙應貴娼婦石小成三命一時斃於筆楚之下彼斗牛始受其陵虐公堂而不甘既被其殺死子民而不忍當日氣絕殞命通縣縉紳生儒百姓不勝悲忿具呈正法則斗牛之死實由大賢之逼所以令大賢恣暴厲殺縣官等四命則永使之也是大賢罪在不赦而永亦難免主使之條矣茲奉聖旨知道了奏內委官杭大賢致死知縣徐斗牛情由果否虛實便著內官梁永會同撫按等官從公究問明白奏請定奪不許偏執徇私該部院知道則斗牛之冤皇上業已洞鑒臣等可容無言矣但詳未之疏不曰委官殺人有罪而曰委官含冤已極則大賢之惡固永所庇護永身犯主使之條則固與大賢同科並罪者也烏可使有罪之人而任會問之責乎况斗牛受皇上牧民之任職雖七品命實至重大賢一旦殺之則天下之為令者胡能一日安於民上而為皇上撫綏元元乎斗牛經管稅銀俱已完解於法可幸無罪大賢又烏得奉求之命而遽殺之也至如王興國趙應貴等三人雖微賤乎皆皇上之赤子也蠅螻三命祇供大賢之一怒而人如草菅彼大賢與末信不可一日容於聖明之世矣伏望皇上勅下彼處撫按將杭大賢等一千人犯嚴行提究如律治罪梁永免令會問撤回京師聽候明旨處分則巨惡懲而朝廷之法紀以振沈寃雪而人心之忿恨以消三秦重地若安瀾矣

萬曆三十三年勅停礦稅

按續文獻通考三十三年十二月初七日文書房劉用捧出聖諭內開朕以頻年天象示警朕心兢惕殊切省躬昨覽工部再疏題請鼎建殿門以完鉅典但

物力難支何時就緒連日熟思見今河工城工一時並舉工程浩大錢糧數多內外帑藏俱匱民窮財盡之時朕甚惻然已遣內官監經管內官查理通濶見貯木植回奏且大工浩費不貲其開礦抽稅原為濟助大工不忍加派小民採征天地自然之利今開礦年久各差內外官俱奏出砂微細朕念得不償費都著停免若有現在礦銀就著礦差內外官一員一併解進馳驛回京原衙門應役凡有礦洞悉令各該地方官封閉培築不許私自擅開務完地脈靈氣其各省直稅課俱著本處有司照舊徵解稅監一半解進內庫以濟進賜供應之用一半解送該部以助各項工費之資明顯朕仰體上天仁愛祖宗監臨敬畏修省實政昭示朝廷權宜濟助大工愛民固本德意待大工稍有次第奏請通行停免卿等擬諭來行

皇清一

雜課定例

大清會典戶部課程關稅

本朝設關權稅歷年建革不一有徵商稅者有徵船料者有兼徵船料商稅者所收課稅解歸戶部間有支撥兵餉河工等項其則例考核辦禁令今並列之

設關處所

崇文門

左翼

右翼

張家口

殺虎口

天津關 舊為河西務
康熙元年改

臨清關

淮安關

揚州關

鳳陽關

蕪湖關

許墅關

北新關

贛關

湖口關

舊為九江關
康熙二十一年改 太平橋關

西新關

江南海關

浙江海關

福建海關

廣東海關

魚課 各省河泊所有專設所官者有歸併有司兼理者其稅課或徵之漁戶或編入地丁例載於後

見設河泊衙門湖廣礦礮湖河泊所黃岡湖河泊所漳源湖河泊所華家湖河泊所沌河蒲潭河泊所桑臺湖河泊所長江局河泊所樟松湖河泊所安鄉河泊所魚苗洋河泊所楮塘湖河泊所九潭湖河泊所 江西楊林河泊所鶴問寨河泊所 福建晉江河泊所 廣東官窑河泊所瀘湖河泊所新安河泊所吉安河泊所東壘河泊所鮑浦河泊所

刑部戶律課程私鑄 凡私煎鑄貨賣者同私鹽法論罪

匿稅 凡客商匿稅及賣酒醋之家不納課程者各五十貨物酒醋一半入官於入官物內以十分為率二分付告人充賞務官攔攔自獲者不賞入門不引同匿稅法其造酒醋自用者

不在此限若買頭匹不稅契者罪亦如之仍於買主名下追徵價錢一半入官一在京在外稅課司局批驗茶引所但係納稅去處省令客商人等自納若權豪無藉之徒結黨把持攔截生事攪擾商稅者徒罪以上枷號二個月發附近充軍杖罪以下照前枷號發落

船商匿貨 凡泛海客商船舶到岸即將貨物盡實報官抽分若停塌沿港土商牙僧之家不報者杖一百雖供報而不盡者罪亦如之物貨並入官停藏之人同罪告獲者官給賞銀二十兩

人戶虧兌課程 凡民間過歲額辦茶鹽商稅諸色課程年終不納齊足者計不足之數以十分為率一分答四十每一分加一等罪止杖八十追課納官若茶鹽運司鹽場茶局及稅務河泊所等官不行用心辦課年終比附上年課額虧兌者亦以十分論一分答五十每一分加一等罪止杖一百所虧課程著落追補還官若有隱瞞侵欺借用者並計贓以監守自盜論

順治元年

大清會典戶部課程關稅凡差官監督順治元年題

准各關專差戶部漢司官一員照例撰給

勅書精微批文 又定左右兩翼差馬法筆帖式張

家口差滿官收稅

雜賦順治元年定凡貿易牲畜按價值每兩納

銀三分

刑部戶律市厘順治元年定凡估踞市行與民

爭利虧損國稅者定置重典

順治三年

大清會典戶部課程蘆課凡官員管理順治三年差

滿漢部員管理蘆政

雜賦順治三年題准當舖每年納稅五兩宛大

二縣大行店舖照當稅例每年徵銀五兩不許

混派小舖 又題准民間食用米麥俱停收稅

順治四年

大清會典戶部課程關稅凡差官監督順治四年題

准荆關通惠河中河清江廠杭州蕪湖龍江蘆

政等關差歸併戶部兼差滿洲漢軍漢官

雜賦順治四年議准嚴禁州縣抽取落地稅銀

名色及勢官土豪不肖有司設立津頭牙店擅

科私稅違者治罪 又覆准凡買田地房屋必

用契尾每兩輸稅銀三分

順治五年

大清會典戶部課程關稅凡差官監督順治五年差

滿司官徵贛關稅

凡考核順治五年題准關差考核稱職方准回

部有不稱者該總督據實題參

順治七年

大清會典戶部課程關稅凡差官監督順治七年定

獨石口殺虎口差滿官筆帖式收稅

蘆課凡丈量順治七年令各督撫遴委屬員將

沿江蘆洲舊額新漲詳查報官如有徇情隱漏

督撫一併議處

大清會典戶部課程關稅凡差官監督順治八年定各關專差漢官每關一員

蘆課凡官員管理順治八年覆准蘆課改歸州縣徵收彙解司庫報部

順治九年

大清會典戶部課程關稅凡差官監督順治九年覆准併西新關江寧倉為一差停獨石口差

凡禁令順治九年題准各關不許留用保家委官等項名色其額設巡邏各製號衣腰牌以杜冒充

蘆課凡官員管理順治九年覆准復差部員管理

凡丈量順治九年覆准每五年丈量一次止丈新漲新墾地增額開除如無漲墾不得重丈滋擾

順治十年

大清會典戶部課程關稅凡禁令順治十年題准令各關差刊示定則設櫃收稅不得勒加火耗需索陋規并禁關役包攬報單

順治十一年

大清會典戶部課程關稅凡差官監督順治十一年題准各關兼差戶部滿漢官筆帖式

又題准各關差令戶部司官歷俸三月者掣籤如無滿俸者方許未滿俸司官掣差

又題准關差向無迴避原籍之例今定直省人各避本府邊鎮人各避本鎮京劄差不在此例

凡考核順治十一年題准關差一年為滿凡到

任同部俱量地遠近限定日期崇文門限前官任滿第二日到任本任滿第二日同部河西務限六日臨清關二十日淮安關五十日揚州關五十五日西新關六十二日蕪湖關鳳陽關六十七日許墅關七十一日北新關九江關八十六日贛關三個月二十日太平橋四個月十五日遲悞者查叅

順治十三年

大清會典戶部課程關稅凡差官監督順治十三年題准各關專差漢官兩翼差筆帖式張家口殺虎口各差滿洲官一員漢軍官一員筆帖式一員照例一年更差

凡禁令順治十三年題准過關船隻如有指稱內外官員及旗下商人夾帶私貨者該關報部叅處

又題准各關當堂設櫃設梁頭貨物則例商民親報填簿輸銀投櫃驗明放行隱漏者治罪如有濫委差役苛索民間小船往來衣服食物該撫察叅

順治十四年

大清會典戶部課程關稅凡禁令順治十四年題准關稅照部頒則例刊榜豎立關口便商輸納

順治十五年

大清會典戶部課程關稅凡差官監督順治十五年題准荊州關差部員收稅

雜賦順治十五年覆准京城中各行鋪每年徵

稅銀二兩五錢
順治十八年

大清會典戶部課程關稅凡差官監督順治十八年題准掣籤法滿司官親寫堂官驗封公掣不許書役干與

蘆課凡考成蘆課銀俟冬季水涸後刈伐變價輪納本年課銀例在次年歷徵年終造冊報部奏銷順治十八年覆准經徵州縣衛所官未完不及一分者罰俸一年未完一分者降俸一級

二分者降職一級俱帶罪督催完日開復三分者降職二級調用四分以上者革職督催司府官及直隸知州都司未完不及一分者停其陞轉未完一分者罰俸一年二分者降俸一級

三分者降職一級俱帶罪督催完日開復四分者降職二級調用五分以上者革職如直隸知州經徵本州蘆課拖欠者照州縣例處分巡撫未完一二分者罰俸一年三分者降俸一級四分者降俸二級五分者降職一級六分以上者降職二級調用署印各官未完一分者罰俸六個月二分者罰俸九個月三分者罰俸一年四五

分者降職一級調用六七分者降職二級調用八分以上者革職署印不及一月者免議叅後限滿不完者照年限例處分

康熙元年

大清會典戶部課程關稅凡差官監督康熙元年題准各關兼差滿漢官筆帖式各一員六部各咨送滿漢官筆帖式各一員輪掣蒙古漢軍俱停

差遣 又張家口殺虎口止差滿洲蒙古官

雜賦康熙元年題准直省雜稅照正賦例依限奏銷違者照違限例參處 又題准禁有司私給稅單收稅如有徇庇及失察者一併參處

諸課凡水銀課貴州額徵開州用砂廠水銀一千二百六十九觔零遇閏加一百三十三觔零
葵川縣葵川廠徵水銀一百六十九觔零俱照時價變賣貯庫造冊報部康熙元年設開州斗甫廠徵水銀九十五觔零遇閏加十觔零又普安縣橋廠招民開採徵水銀三百三十三觔

康熙二年

大清會典戶部課程關稅凡差官監督康熙二年題

准滿官差郎中員外漢官止差郎中 又題准

兩翼張家口殺虎口與各關一例輪差六部官

員

凡禁令康熙二年題准外國人帶進貨物崇文

門不必收稅

康熙三年

大清會典戶部課程關稅凡差官監督康熙三年題

准各關差令六部滿洲蒙古漢軍漢人各司官

及筆帖式一併掣籤其兩翼張家口殺虎口仍

差戶部官員筆帖式 又題准各關差滿漢官

員到任未滿四月有事故者補差同先差官更

替四月以外不准補差如筆帖式有事故不論

月分補差同滿漢官更替 又題准除已出各

項部差不復差外其差過一次官員照回部月

日久者送戶部輪掣凡在差六月外有事故掣

回者即作一差不及六月者仍補差 又題准六部各司甯俸淺一員辦事餘員送差如止一員不准送 又題准各關停差筆帖式兩翼張家口殺虎口仍照舊例

康熙四年

大清會典戶部課程關稅凡差官監督康熙四年題

准各關稅俱交地方官管理崇文門歸治中天

津關歸天津道龍泉各關口歸井陘道紫荆各

關口歸直隸守道臨清關歸東昌道兗運廳歸

通薊道居庸關歸昌密道西新關歸江鎮道蕪

湖關歸池太道揚州關歸驛揚道許墅關歸蘇

常道淮安關歸淮海道北新關歸浙江布政使

荆關歸荊州府同知九江關歸巡九道贛關歸

守北道太平橋歸南雄知府遇仙橋洽光廠歸

韶州知府徵收稅課兩翼張家口殺虎口仍差

戶部滿官

凡考核康熙四年題准地方官徵收關稅以受

事日為始扣至一年督撫題報考核

凡禁令康熙四年題准各關不許復用舊役

蘆課凡官員管理康熙四年

諭停差部員令地方官徵收

康熙五年

大清會典戶部課程關稅凡禁令康熙五年題准以

後崇文門貨物出門者免稅

康熙七年

大清會典戶部課程關稅凡差官監督康熙七年題

准崇文門兩翼選差各部滿漢官員北新關改

隸兩浙運使

諸課凡水銀課康熙七年題准四廠連閏徵收水銀變價撥充本省兵餉

康熙八年

大清會典戶部課程關稅凡差官監督康熙八年覆

准各關仍令六部滿漢官員論俸掣差先差過

者不准再差臨清倉併臨清關為一差贛關太

平橋兗運廳居庸關龍泉紫荆荊州等關仍交

地方官

凡考核康熙八年題准關稅欠不及半分者罰

俸一年半分至一分以上者降一級調用二分

以上者降二級調用三分以上者降三級調用

四分以上者降四級調用五分以上者革職缺

額錢糧免其追賠盜額不准議叙如有事故以

離任日為止作分數考核至商稅不令親填簿

冊及不給紅單者俱罰俸一年如將部頒稅簿

用伊印添送或將稅簿紅單不按季報部者俱

罰俸半年收稅單簿送部限期天津關二十日

臨清關二十五日淮安關揚州關許墅關三十

五日蕪湖關西新關四十日北新關四十五日

九江關五十五日贛關六十日

凡禁令康熙八年題准各關刊榜除去鈔貫字

樣明載徵銀數目收稅單一樣填寫二張一畱

商人一送部查

蘆課凡官員管理康熙八年復差滿漢部員管

理

康熙九年

大清會典戶部課程關稅凡差官監督康熙九年覆

准淮安關兼管淮安倉及工部清江廠 又題

准兩翼止差滿官筆帖式 又題准戶部蕪湖

關兼管工部蕪湖關工部龍江關兼管戶部西

新關仍照各部錢糧核銷

凡禁令康熙九年題准各關名募書吏不許舊

役更名復充

諸課凡水銀課康熙九年覆准黔西府屬新開

黃土坎廠徵水銀一百斤

康熙十年

大清會典戶部課程蘆課凡官員管理康熙十年覆

准停差部員仍令地方官徵收

康熙十一年

大清會典戶部課程關稅凡考核康熙十一年題准

關差同京原領

勅書精微批文親繳部科違限一月以內免議一月

以外照例議處

凡禁令康熙十一年題准裁各關典吏攢典

雜賦康熙十一年題准直省牙行當舖門攤等

稅皆在地丁外不必開載由單

康熙十二年

大清會典戶部課程蘆課凡考成康熙十二年覆准

蘆課錢糧未完大小各官或初叅或限滿題叅

者俱照准徐等倉錢糧未完官員初叅及限滿

例叅處

雜賦康熙十二年覆准小民肩挑背負尺布斗

米蔬果食物貿易者地方官不許徵稅違者督

撫題叅官照私派議處棍蠹計賊論罪
康熙十四年

大清會典戶部課程關稅凡差官監督康熙十四年

議准各關選差賢能官員其筆帖式仍論俸差

遣停其議叙議處

凡考核康熙十四年題准各關欠不及半分者

降一級畱任餘照前例全完者紀錄一次溢額

每一千兩者加一級至五千兩以上者以應陞

缺先用部差官員不令督撫管轄如地方荒亂

河道壅塞自行報部移咨督撫查覆考核

雜賦康熙十四年題准商稅項下水腳銀全裁

解部

欽定古今圖書集成經濟彙編食貨典

第二百二十六卷目錄

雜稅部彙考十

皇清二 康熙十二則

食貨典第二百二十六卷

雜稅部彙考十

皇清二

康熙十六年

大清會典戶部課程關稅凡差官監督康熙十六年

題准額關太平橋仍差部員

凡考核康熙十六年題准各關額稅二萬兩以

下者仍照前例議敘二萬兩以上者額稅全完

紀錄一次溢額半分以上加一級一分以上加

二級一分半以上加三級二分以上加四級三

分以上以應陞缺先用數多者遞准加級

雜賦康熙十六年題准直省當稅每年增銀五

兩連舊額十兩 又題准增徵江南浙江湖廣

各府契稅每年蘇松常鎮四府大縣六百兩中

縣四百兩小縣二百兩安徽等十府州分別州

縣大小自五百兩至一百兩不等揚州府照全

書額徵准徐二府州屬及英霍宿臨五懷定靈

虹九州縣俱無定額儘收儘解杭嘉湖寧紹金

嚴七府大縣三百兩中縣二百兩小縣一百兩

台衛溫處四府仍照現徵造報湖北上縣一百

五十兩中縣一百兩下縣五十兩下州縣一

十兩

康熙十七年

大清會典戶部課程關稅凡考核康熙十七年令關

稅足額者不准議敘

雜稅康熙十七年題准增山東等省田房契稅

大縣二百四十兩或一百八十兩中縣一百二

十兩小縣六十五兩或三十五兩

康熙十八年

大清會典戶部課程關稅凡差官監督康熙十八年

覆准各關仍論俸差遣

凡禁令康熙十八年

諭各關額外橫徵差役四出擾害商民者該部嚴禁

察參

蘆課凡丈量康熙十八年覆准清丈江南復業

蘆田照墾荒例於三年後起科

雜賦康熙十八年題准直省雜項錢糧俱照正

賦例考成

康熙十九年

大清會典戶部課程關稅凡差官監督康熙十九年

題准潼關山海關照例差六部滿官一員潼關

併收大慶關龍駒寨二處稅課

雜賦康熙十九年題准山東仍開海禁令該撫

查報船戶毋致匿稅

康熙二十年

五月十二日

上諭戶部宣府太原大同等處近罹災傷人民困苦

所徵房號銀兩應與除免爾部議奏

大清會典戶部課程雜賦康熙二十年題准增浙江

台衛溫處四府契稅大縣一百兩中縣六十兩

小縣三十兩

康熙二十一年

大清會典戶部課程關稅凡差官監督康熙二十一

年題准鳳陽關照例差六部滿官一員收稅舊

係鳳陽倉徵收 又題准九江關移駐湖口

又覆准停差潼關山海關部員仍交地方官分

管

雜賦康熙二十一年題准增江西萍龍永瀘上

定六縣契稅

康熙二十二年

大清會典戶部課程蘆課蘆之地惟江南江西湖

廣三省有之自上斬黃下至常鎮皆濱江處所

坍塌不一定例五年一丈增補缺額若差部員

管理則屬工部若歸併州縣管理則屬戶部隨

時更易康熙二十二年各省冊報總計蘆洲地

五萬九千九百七十八頃七十六畝零又地六

百九十八丈六尺零江蘇布政司蘆地二萬八

千三百七十三頃六十畝零安徽布政司蘆地

二萬三千九百一十八頃七畝零江西布政司

蘆地三千二百三十三頃一十三畝零湖南布政司

蘆洲四千六百六十三頃九十六畝零地六百

九十八丈六尺零總計蘆課銀一十六萬四千

八百三十七兩五錢九分零江蘇布政司蘆課銀一十一萬一千二百兩六錢三分零安徽布政司蘆課銀四萬一千六百二十六兩六分零江西布政司蘆課銀五千八百八十九兩六錢八分零湖南布政司蘆課銀六千一百二十一兩二錢二分零

凡徵收科則江南蘆課銀上田每畝八分五釐中田每畝七分下田每畝六分墾地密蘆地每畝各四分上地墾划每畝各三分五釐稀蘆地每畝三分草地水蕩划水影灘每畝各一分上泥灘白水灘每畝各五釐次泥灘每畝二釐下泥灘每畝一釐江西蘆課銀上地每畝三分五釐密蘆地每畝三分中地每畝二分五釐下地每畝二分二釐稀蘆地柳林每畝各二分下地每畝一分五釐草地魚塘每畝各一分湖廣蘆課銀密蘆地每畝三分四釐至五釐不等草墻地每畝二分五釐至三釐不等中地每畝二分五釐麥地每畝二分三釐至一分三釐不等草墻基地每畝二分三釐至一分二釐不等稀蘆地每畝二分二釐至六釐不等上地每畝一分九釐中地每畝一分五釐淤地每畝一分四釐二毫下地每畝一分至八釐三毫不等水蕩下地每畝九釐下蘆田蘆地每畝各七釐草場地葫荻地湖墾地下草地每畝各六釐磯民房地每丈五分基地每丈三分二釐五毫凡丈量康熙二十二年覆准蘆田止丈濱江處所腹內蘆田既無冊漲不必丈量

魚課課額康熙二十二年各省魚課共銀四萬一千五百五十七兩零江南魚課八千九百七十七兩三分零江蘇等屬一千四百七十五兩三錢三分又江寧六合丹徒三處鱗魚折銀併魚塢租水面冬網共銀五百八十八兩四錢七分零外遇閏加銀一十八兩二錢八分零其淮防廳魚稅儘收儘解安徽等屬六千九百一十三兩二錢三分零又錢一萬二千七十五文外遇閏加銀三百五十一兩八錢一分零錢七百五十八文浙江魚課二千一百七兩七錢五分零係魚課項下米麻鐵路費本折數其河泊所各地方官徵課彙入商稅項下江西魚課四千七百九十五兩二錢四分零湖廣魚課一萬一千二十五兩四分零係湖北徵課其湖南魚課彙入雜稅項下福建魚課一萬一千三百七十六兩九錢九分零山東魚課一十五兩七錢六分雄崖安東靖海三衛所徵收魚筏等稅廣東魚課三千一百一十八兩八錢二分零外遇閏加徵一百一十兩二錢五分零又各州縣魚稅彙入雜稅項下廣西魚課一百四十八兩七錢六分零係梧州平樂二府徵課

康熙二十三年九月初一日

上諭大學士勒德洪等向令開海貿易謂於粵閩邊海民生有益若此二省民用充阜財貨流通各省俱有裨益且出海貿易非貧民所能富商大賈買還有無薄徵其稅不致累民可充粵閩兵

餉以免腹裏省分轉輸協濟之勞腹裏省分錢糧有餘小民又獲安養故令開海貿易今若照伊爾格圖等所呈給與各關定例款項於橋道渡口等處概行徵稅何以異於原無稅課之地反增設一關科斂乎此事恐致擾害民生爾等傳諭九卿詹事科道會議具奏

大清會典戶部課程關稅凡差官監督康熙二十三年覆准福建廣東二省設滿漢海稅監督各一員筆帖式各一員又覆准六部司官仍照前差遣外其餘衙門應均分差遣宗人府理事副理事主事內閣侍讀起居注主事都察院都事經歷共四十二員作一分督捕郎中員外郎主事太僕寺員外郎共五十員作一分理藩院郎中員外郎主事大理寺寺正光祿寺署正共五十七員作一分各照六部司官論俸差遣其各衙門筆帖式亦應均差以吏科國子監歸吏部員額內共筆帖式一百一十三員鴻臚寺太常寺戶科中書科登聞鼓衙門歸禮部員額內共筆帖式一百一十六員鑾儀衛起居注歸兵部員額內共筆帖式一百一十四員內閣中書歸宗人府員額內共一百三十員大理寺光祿寺禮科兵科詹事府通政司欽天監歸理藩院員額內共筆帖式一百五十員太僕寺刑科工科翰林院歸督捕員額內共筆帖式一百五十一員都察院歸工部員額內共筆帖式一百三十九員亦按年分差遣又題准張家口殺虎口二處停止專差戶部照各關例令各部院官員

掣差

凡禁令康熙二十三年覆准福建廣東許用五百石以下船隻出海貿捕地方官登記人數船頭烙號給發印票令防守海口官員驗票放行撥船巡哨如有雙桅八槳五百石以上大船出洋夾帶禁物及文武官借端需索者俱從重治罪其海口內橋津舟車等物停止徵收

康熙二十四年

大清會典戶部課程關稅凡差官監督康熙二十四年覆准江南浙江二省設滿漢海稅監督各一員筆帖式各一員又覆准西新龍江二關各設專員課稅仍照各部銷算

凡禁令康熙二十四年議准江浙二省亦許出海貿易其禁例與福建廣東同又覆准福建沿海無篷桅捕魚船稅仍聽地方官徵收其有篷桅船隻聽監督照例徵收梁頭稅課沿海要口俱撥哨船衙役巡查

雜賦直省各項稅課有定額徵收者有未經定額儘收儘解者經徵之官或隸道員或歸有司或責佐貳或設大使或屬弁員所收稅銀彙貯司庫或撥充兵餉或起解戶部其間有附地丁冊奏銷者有另案奏銷者例各不同康熙二十四年直省奏報雜賦共銀六十七萬三千八百八十一兩零直隸共銀六萬四千四百八十一

兩一錢九分零內房地稅銀六千四百九十三兩一錢一分五釐零當稅銀二萬二千六百六十兩牛驢等稅銀四千七百一十兩七錢四分二釐零花布稅銀一千三百五十一兩九錢六分零缸麵稅銀一千六百八十六兩八錢零酒稅銀二千五百兩田產稅契銀二千八百八十六兩三錢三分五釐零牙帖稅銀一萬七百二十八兩六錢五分八釐零龍泉紫荊等關口稅銀一千一百三十七兩五分以上撥充兵餉如有餘剩解部海稅銀五百一十二兩六錢八分零解部抽印木植銀四百兩河利銀八百五十兩磚料銀六百兩學租錢易銀七兩九錢四分二釐四毫算麻銀八兩七錢三分榛栗折色銀四十八兩房租銀九兩九錢二分以上附地丁錢糧冊奏銷空運廳額徵銀六千三百三十九兩二錢六分舊差部員今隸通求道居庸關額徵銀三千兩舊差部員今隸井陘道盛京共銀九百四十七兩八錢九分四釐內鋪行戶稅銀五百五十二兩五錢雜稅銀一百六十二兩六錢四分四釐經紀稅銀二百三十二兩七錢五分以上解交盛京戶部江南江蘇等處共銀五萬三千二百六兩二錢九分零內田房稅契銀一萬九千九百五十八兩八分四釐零牙帖鹽牙稅銀九千三百一十六兩四錢四分零牛驢猪羊花布烟包稅銀三千四十一兩七錢七分零當稅銀一萬五千七十兩槽坊酒稅銀五千八百二十兩安徽等處共銀三萬一十二兩九

錢六分零內田房稅契銀一萬二千八百七十七兩七錢七分零牛驢等稅銀四千三百二十三兩花布烟包油麵等稅銀二千三百八兩一錢九分三釐牙帖稅銀五千三百九十四兩當稅銀三千四十兩槽坊酒稅銀二千七十兩浙江共銀五萬六千四百七十兩三錢一分零內稅契銀一萬六百九十兩牙稅銀四千三百二十七兩三錢牛稅銀七百一兩三錢三分零雜稅銀五百四十九兩六錢零當稅銀五千五百九十兩酒稅銀一千八百七十兩馬稅銀九十八兩八錢八分駐防各旗雜稅銀二十兩四錢外賦并南關杉板銀三萬二千六百二十二兩八錢四釐零以上除撥餉外俱解部江西共銀三萬二千三百三十三兩三錢三分零內匠班七千九百七十一兩五錢六分六釐四毫商稅銀一萬二千六十四兩二錢三分零併入地丁起運銀內撥用田房稅契銀七千四百六十兩當稅銀三百八十兩牙帖稅銀二千六百一十兩五錢酒稅銀一千四百五十兩牛稅銀三百九十七兩四分以上或撥餉或解部湖廣湖北等處共銀三萬四千五百三十七兩一錢四釐零內驛鹽道項下鹽牙稅銀四千七十七兩武昌廠船料銀一萬兩漢陽府船稅銀五兩商稅銀五千一百八十四兩八錢五分零田房稅銀四千三百七十三兩七錢四分四釐當稅銀一千一百一十兩牙稅銀七千三百四十四兩茶稅銀四百六十兩鐵稅銀五百兩酒稅銀一千